

PEMBERITAHUAN PERTANYAAN BUKAN LISAN DEWAN RAKYAT

PERTANYAAN : BUKAN LISAN

DARIPADA : DR. AZMAN BIN ISMAIL [KUALA KEDAH]

SOALAN NO. 101

Minta **MENTERI KESIHATAN** menyatakan statistik penyakit-penyakit berkaitan tabiat merokok yang dirawat di Malaysia mengikut tahun bagi 3 tahun terakhir dan jumlah kes serta anggaran kos rawatan bagi setiap jenis penyakit.

JAWAPAN

Yang di-Pertua,

Kanser Paru-Paru, *Ischaemic Heart Disease* dan Penyakit Paru-Paru Kronik merupakan tiga penyakit utama selain lebih sepuluh jenis penyakit-penyakit kronik akibat tabiat merokok. Statistik daripada Pusat Informatik Kesihatan, Kementerian Kesihatan Malaysia mendapati jumlah kemasukan ke wad bagi penyakit kanser paru-paru adalah sebanyak 5,611(dengan 985 kematian) pada tahun 2016, sebanyak 6,234 kemasukan (867 kematian) pada tahun 2017, dan sebanyak 5,673 kemasukan (815 kematian) pada tahun 2018.

Bagi penyakit *Ischemic Heart Disease* pula, jumlah kemasukan ke wad adalah sebanyak 70,807 (dengan 4,058 kematian) pada tahun 2016, sebanyak 69,913 (3,284 kematian) pada tahun 2017 dan sebanyak 72,478 (3,176 kematian) pada tahun 2018. Manakala bagi penyakit Paru-Paru Kronik sebanyak 27,097 telah dimasukkan ke dalam wad (dengan 601 kematian) pada tahun 2016 , sebanyak 28,616 (609 kematian) pada tahun 2017 dan sebanyak 30,604 (665 kematian) pada tahun 2018.

NO SOALAN : 101

Kerajaan telah menanggung beban kos yang tinggi untuk merawat penyakit-penyakit akibat komplikasi merokok. Menurut anggaran beban kewangan untuk merawat tiga penyakit yang disebutkan di atas dan berdasarkan kajian *Health Care Cost of Smoking in Malaysia* oleh Universiti Kebangsaan Malaysia pada tahun 2007 dengan mengambil kira pertumbuhan penduduk sebanyak 1.5% (Jabatan Statistik Malaysia, 2015) dalam masa 5 tahun dan juga kenaikan kos perubatan sebanyak 5% setahun kos rawatan pada tahun 2017 adalah sebanyak RM5.54 juta dan RM5.28 juta pada tahun 2018.

Unjuran seterusnya telah menunjukkan anggaran peningkatan yang membimbangkan iaitu sebanyak RM6.21 juta menjelang tahun 2020 dan RM7.4 juta menjelang tahun 2025. Kementerian Kesihatan Malaysia memandang serius akan masalah ini dan jika masalah merokok tidak ditangani dengan segera, Kerajaan akan terus menanggung kos rawatan, bukan sahaja untuk merawat tiga penyakit ini malahan juga merawat penyakit-penyakit yang lain akibat komplikasi merokok.